

Harikayn Taim Raim

Joon, too soon
Joolai, stan bai
Aagas, kohn yu mos
Septemba, rimemba
Aktoaba, aal oava

Di ada day mi ma ahn mee mi-di taak bowt harikayn seezn. Shee tel mi da lee sayin abov weh raim, weh pipl doz seh eena Bileez bowt harikayn taim. Now, memba seh dat bak eena di dayz, harikayn taim doz bi fahn fos a Joon tu en a Aktoaka. Bot noh tudeh day—maybi da sayk a klaimit chaynj er sohnting els, bot tudeh day, harikayn seezn goh langa. Ih stil staat fos a Joon, noh main seh dat eena dehnya paas fyoo yaaz, da fahn eena May wi don di staat si di Atlantik di bobl an bail op wid sohn schrang May staam don di staat kohn! Soh far, doh, di ofishal staat a harikayn seezn da stil fos a Joon. Bot di en a di seezn da now en a Novemba! So mi ma seh wi need fi chaynj di Aktoaba lain eena di **Harikayn Taim Raim** ahn ad een wahn lain bowt Novemba.

Joon, too soon
Joolai, stan bai
Aagas, kohn yu mos
Septemba, rimemba
Aktoaba, ~~aal oava~~ stay soaba
Novemba, aal oava

Dis Septemba, wi maak 222 yaaz sins di Batl a Sayhn Jaajiz Kee ahn 39 yaaz sins Bileez Indipendans. Wi di salibrayt eena wi haat dis yaa, sayk a koroanavairos deh rong. Stay schrang, Bileez! Ahn memba seh wi stil deh eena harikayn seezn!